

17/06/2003

Myanmar dinasihati bebaskan Suu Kyi

Kadir Dikoh

KUALA LUMPUR: Malaysia mahu melihat Myanmar menyahut gesaan Asean secara positif dengan membebaskan pemimpin prodemokrasi, Aung San Suu Kyi, kata Datuk Seri Abdullah Ahmad Badawi.

Timbalan Perdana Menteri berkata, nasihat Asean kepada pemerintah junta

Myanmar supaya membebaskan pemenang Hadiah Nobel Keamanan itu adalah sesuatu yang membabitkan perhubungan konstruktif.

"Ia bukan niat Asean untuk campur tangan dalam urusan dalaman negara anggota. Saya tidak pernah mendengar hasrat Asean untuk meminggirkan dasar

tidak campur tangan, tetapi mereka (Asean) mahu menjalin hubungan dengan Myanmar secara membina bagi membantu mengatasi apa saja masalah yang kita

lihat wujud di Myanmar.

"Saya harap mereka berjaya. Saya yakin, saya memahami hakikat bahawa Myanmar akan menerima pandangan anggota Asean yang boleh mereka yakini dan percayai.

"Saya suka melihat Myanmar memberi tindak balas kepada gesaan Asean secara positif," katanya.

Beliau berkata demikian pada sidang media selepas merasmikan Persidangan

Tahunan Kelapan mengenai Minyak dan Gas Asia bagi mewakili Perdana Menteri, Datuk Seri Dr Mahathir Mohamad di Hotel Mandarin Oriental di sini, semalam.

Di PHNOM PENH, Menteri Luar Asia Tenggara turut mendesak Myanmar membebaskan pemimpin pembangkang itu ketika memulakan rundingan tahunan selama dua hari di ibu negara Kemboja semalam.

Setiausaha Agung Asean, Ong Keng Yong, dipetik sebagai berkata semua negara pertubuhan berkenaan berharap Suu Kyi dibebaskan supaya wanita itu

dapat meneruskan tugasnya.

Suu Kyi ditahan oleh kerajaan tentera Myanmar pada 30 Mei lalu selepas pertempuran antara penyokongnya dengan gerombolan prokerajaan di utara Myanmar.